

癰瘡

積塊

虛損

勞瘵

汗

不汗

便濁
附便數

遺精

麻木

寒中

惡寒

惡熱

熱氣病

名醫類案
辰



名醫類案卷第五

新都篁南江瓘集

後學

仁和余集蓉裳
錢塘魏之琇玉橫
仁和沈烺數曾
歙鮑廷博以文

重校

癥瘕

齊中尉潘滿如病少腹痛臣意診其脉曰遺積瘕也臣意卽
謂齊太僕臣饒內史臣繇曰中尉不復自止於內則三十
日死後二十餘日洩血死病得之酒且內所以知潘滿如
病者臣意切其脉深小弱其卒然合合也是脾氣也右脉
口氣至緊小見瘕氣也以次相乘故三十日死三陰俱搏



者如法。不俱搏者。決在急期。一搏一代者。近也。故其三陰搏。洩血如前止。史記

臨菑女子薄吾病甚。衆醫皆以爲寒熱篤。當死不治。臣意診其脉曰。螻癭。螻癭爲病。腹大上膚黃粗。循之戚戚然。臣意飲以芫花一撮。卽出螻可數升。病已三十日如故。病螻得之於寒溼。寒溼氣宛篤不發。化爲蟲。臣意所以知薄吾病者。切其脉。循其尺。其尺索刺粗。而毛美奉髮。是蟲氣也。其色澤者。中藏無邪氣及重病。史記
博按此案重見諸蟲門

隋有患者。嘗飢而吞食。則下至胸。便卽吐出。醫作噎疾。膈氣翻胃。三候治之。無驗。有老醫任度視之曰。非三疾。蓋因食

蛇肉不消而致，但揣心腹上有蛇形也。病者曰：素有大風，常求蛇肉食，風稍愈，復患此疾矣。遂以芒硝、大黃合而治之，微泄利則愈。乃知蛇瘕也。

名醫錄

乾德中，江浙間有慎道恭，肌瘦如勞，唯好食米，闕之則口中清水出，情似憂思。食米頓便如常。衆醫莫辨，後遇蜀僧道廣，以雞屎及白米各半合，共炒爲末，以水一盞調頓服。良久，病者吐出如米形，遂瘥。病原謂米瘕是也。

徐文伯善醫術。宋明帝宮人患腰痛，牽心發，則氣絕。衆醫以爲肉瘕。文伯視之曰：此髮瘕也。以油灌之，卽吐物如髮，稍引之，長三尺，頭已成蛇，能動，懸柱上，水瀝盡，唯餘一髮而

已遂愈

唐書曰甄權弟立言善醫時有尼明律年六十餘患心腹膨脹身體羸瘦已經二年立言診其脉曰腹內有蟲當是誤食髮爲之耳因令服雄黃須臾吐一蛇如小手指唯無眼燒之猶有髮氣其疾乃愈

太平御覽

異苑曰章安有人元嘉中噉鴨肉乃成瘕病胸滿面赤不得飲食醫令服秫米須臾煩悶吐一鴨雛身喙翅皆已成就唯左脚故綴昔所食肉遂瘥

太平御覽

志怪曰有人得瘕病腹晝夜切痛臨終敕其子曰吾氣絕後可剖視之其子不忍違言剖之得一銅酒鎗容數合許華

佗聞其病而解之便出巾櫛中藥以投卽消成酒焉

博按母論

事涉怪誕不足徵信世安有剖父腹以驗病之理此案可刪

景陳弟長子拱年七歲時脇間忽生腫毒隱隱見皮裏一物

頗肖鼈形微覺動轉其掣痛不堪德興古城村外有老醫

見之使買鮮蝦爲羹以食咸疑以爲瘡毒所忌之味醫竟

令食之下腹未久痛卽止喜曰此真鼈瘻也吾求其所好

以嘗試之爾乃製一藥如療脾胃者而碾附子末二錢投

之數服而消明年病復作但如前補治遂絕根

類編

昔有人共奴俱患鼈瘻奴前死遂破其腹得白鼈仍故活有

人乘白馬來看鼈白馬遂尿隨落鼈上卽縮頭尋以馬尿

灌之卽化爲水其主曰吾將瘥矣卽服之遂愈續搜神記

昔人患癰瘰死遺言令開腹取之得病塊乾硬如石文理有五色人謂異物竊取削成刀柄後因以刀刈三稜柄消成水乃知此藥可療癰瘰也本草

一人患蛇瘰常飢食之卽吐乃蛇精及液沾菜上人悞食之腹內成蛇或食蛇亦有此症用赤頭蜈蚣一條炙爲末分二服酒下

一人患鼈瘰痛有來止或食鼈卽痛用雞屎一升炒黃投酒中浸一宿焙爲末原浸酒調下

一人好飲油每飲四五升方快意乃悞吞髮入胃血裏化爲

蟲也用雄黃五錢水調服

石藏用蜀人良醫也名盛著一士人嘗因承簷溜盥手覺爲物觸入指爪中初若絲髮然旣數日稍長如線伸縮不能如常始悟其爲龍伏藏也乃扣治療之方於石石曰此方書所不載也當以意去之歸可末蜣螂塗指庶不深入胸膜冀他日免震厄之患士人如其言後因迅雷見火光遍身士人懼急以鍼穴指果見一物自鍼穴躍出不能災

桓宣武有一督將因時行病後虛熱便能飲複茗必一斛二斗乃飽裁減升合便以爲大不足後有客造之更進五升乃大吐一物出如升大有口形質縮皺狀似牛肚客乃令

置之盆中，以斛二斗覆茗澆之，此物翕之都盡而止，覺小脹，又增五升，便悉渾然從口中湧出，既吐此物，遂瘥，或問之，此何病？荅曰：此病名斛茗瘥。續搜神記

齊諧記云：江夏安陸縣隆安中，有人姓郭名坦，得天行病後，遂大善食，一日消斗米，家貧不能給，行乞於市，一日大飢，不可忍，人家後門有三畦薤，因竊啗之，盡兩畦，便大悶極，臥地，須臾大吐，吐一物如龍，因出地，漸小，主人持飯出食之，不復食，因撮飯著所吐物之上，卽消而成水，此病尋瘥。

東坡物類相感志

永徽中崔爽者，每食生魚三斗乃足，一日飢作鱸，未成，忍飢

不禁遂吐一物如蝦蟆自此不復能食鱠矣

宣室志

有黃門奉使交廣回周顧謂曰此人腹中有蛟龍上驚問黃門曰卿有疾否曰臣馳馬大庾嶺時大熱困且渴遂飲水覺腹中堅痞如石周以硝石及雄黃煮服之立吐一物長數寸大如指鱗甲具投之水中俄頃長數尺復以苦酒沃之如故以器覆之明日已生一龍矣上甚驚訝

明皇雜錄

褚澄治李道念有冷疾

元本
悞痰

五年衆醫不瘥澄爲診脉謂曰

汝病非冷非熱當是食白瀹雞子過多所致令取蒜一升煮服之始一服吐一物如升涎裏之動開看是雞雛羽翅爪距具足能行走澄曰此未盡更服所餘藥又吐得如向

者有十三頭而病都瘥

南史

證治要訣云一人病癥瘕腹脹純用三稜莪朮以酒煨服下
一物如黑魚狀而愈或加入香附子用水煎多服取效
一人自幼好酒片時無酒叫呼不絕全不進食日漸羸瘦或
執其手縛柱上將酒與看而不與飲卽吐一物如猪肝入
酒內其人自此遂惡酒

潘璟字溫叟名醫也虞部員外郎張咸之妻孕五歲南陵尉
富昌齡妻孕二歲團練使劉彝孫妾孕十有四月皆未育
溫叟視之曰疾也凡醫妄以爲有孕爾於是作劑飲之虞
部妻墮肉塊百餘有睂目狀昌齡妻夢二童子色漆黑倉

卒怖悸疾去，尋孫妾墮大蛇，猶蜿蜒不死。三婦皆無恙。

夷堅

志○琇按此案重見

第十一卷 娠症門

鎮陽有士人嗜酒，日嘗數斗。至午夜飲興一發，則不可遏。一夕大醉，嘔出一物，如舌，視無痕竅。至欲飲時，眼徧其上，蠱然而起。家人沃之以酒，立盡。至常日所飲之數而止，遂投之。猛火急爆裂，爲十數片。士人由是惡酒。

汾州王氏得病，右脇有聲如蝦蟆，常欲手按之，不則有聲。聲相接，羣醫莫能辨。詣畱陽山人趙巒診之。趙曰：「此因驚氣入於臟腑，不治而成疾。故常作聲。」王氏曰：「因邊水行次，有大蝦蟆躍高數尺，驀作一聲，忽驚叫，便覺右脇牽痛。自後

作聲尚似蝦蟆也久未瘥巒乃診王氏脉右關脉伏結積病也故正作積病治用六神丹泄下青涎類蝦蟆之衣遂瘥

瘥名醫錄

昔有患者飲食如故發則如癲面色青黃小腹脹滿狀如妊孕醫診其脉與証皆異而難明主療忽有一山叟曰聞開皇六年灞橋有患此病蓋因三月八日邊水食芹菜得之有識者曰此蛟龍病也爲龍游於芹菜之上不幸食之而病也遂以寒食餠每劑五合服之數劑吐出一物形雖小而狀似蛟龍且有兩頭獲愈

句容縣佐史能啖鱸至數十觔恒食不飽縣令聞其善啖乃

出百觔史快食至盡因覺氣悶久之吐一物狀如麻鞋底
令命洗出安鱸所鱸悉成水醫莫能名之令小吏持往揚
州賣之冀有識者誠之若有買者但高舉其價看至幾錢
有胡求買增價至三百貫文胡輒還之初無酬酢人謂胡
曰是句容縣令家物問此是何物胡云是銷魚之精亦能
銷腹中塊病人患者以一片如指端繩繫之置病所其塊
卽銷我本國太子少患此病王求愈病者賞之千金君若
見賣當獲大利令竟賣半與之

廣異記

和州劉錄事者大歷中罷官居和州旁縣食兼數人尤能食
鱸嘗言鱸味未嘗果腹邑客乃網魚百餘觔會於野庭觀

其下筋劉初食鱸數櫟忽似小哽因設出一骨珠子大如豆乃寘於茶甌中以櫟覆之食未半怪覆甌櫟傾側舉視之向骨珠子已長數寸如人狀座客共觀之隨視而長頃刻長及人遂捽劉因相毆流血良久各散走一循廳之西一轉廳之左俱及後門相觸翕成一人乃劉也神已癡矣半日方能語訪其所以皆不省之劉自是惡鱸

酉陽雜俎

戴人治王宰妻病胸膈不利用痰藥一湧而出雪白蟲一條長五六寸有口鼻牙齒走於涎中病者忿而斷之中有白髮一莖按永徽中破一物其狀如魚卽所謂生瘕也

嘉靖中長洲鄒表妻患小腹下左生一塊形如梅李久之吐

出始則腐潰若米糲之狀中則若蜆肉之狀以指撚開則有長髮數條在其內名醫竟不能治遂至不起夫蛇髮等痕往往載於方書或偶因食物相感假血而成理或有之不可指爲妄誕也

山東民間婦人一臂有物隱然膚中屈佶如蛟龍狀婦喜以臂浸盆中一日雷電交作自牖出臂果一龍擘雲而去雪

錄

積塊

羅謙甫治真定王用之年二十九歲病積臍左連脇如覆杯

腹脹如鼓。多青絡脉。喘不能臥。時值暑雨。加之自利完穀。日晡潮熱。夜有盜汗。以危急求治。羅視之。脉得浮數。按之有疑力。謂病家曰。凡治積。非有毒之劑攻之。則不可。今脉虛弱如此。豈敢以常法治之。遂投分滲益胃之劑。數服而清便自調。繼以升降陰陽。進食和氣。而腹大減。胃氣稍平。間以削之。月餘良愈。先師嘗曰。潔古有云。養正積自除。譬之滿座皆君子。縱有小人。自無所容。今令真氣實。胃氣強。積自除矣。潔古之言。豈欺我哉。內經云。大積大聚。衰其大半而止。滿實中有積氣。大毒之劑。尚不可過。況虛中有積者乎。此亦治積之一端也。邪正虛實。宜精審焉。